



Шормо эл, порылык да ыш бер!

49-ше (3281) №,
2016 ий 3 декабрь,
шуматкече.

ЯМДЕ ЛИЙ

1933 ий 1 февраль годсек лектеш.

0+



САЛАМ, ОШ ТЕЛЕ!

*Кыдыр-кудыр тўрлеман
Кижык лум велеш шыман:
Шўргыш, кидыш тўкнылеш,
Лыве селмынак модеш!
Теле ончо, ял воктен
Теле мамыкшым оптен.
Тушергат шога пўршан,
Кочаем гай чал ўрышан.
Ош калпакым кож уншалын,
Тюльым сакалтен садер.
Эх, ончал: могай сўралын
Сўретлалтын шо чмо вер!
Анатолий ФЕДОРОВ.*

Теле
115 кече
шўйна,
15 мартыште
пыта.

Даша ДЕКИНАН сўретше.
2-шо номеран Морко школ.

Подписке - 2017

1-11 декабрьште
Россий мучко
подписке декаде эрта.
«Ямде лий» газетын акше - 216 теңгеат 30 ыр.
Индекс: Д8574.

Рекламе.

ЧУМЫРГАЛЗА ВОКТЕКЕМ! «ЯМДЕ ЛИЙ» ДЕНЕ ПАЛДАРЕМ!




Снимкыште - Марий Турек район гыч Ефросиния Якимова.
ЛЯКИМОВАН фотожо.

Квитанцийын копияжым редакцийыш колто, ЛОТЕРЕЙ модышыш ушно!

Пўлек-влак:
♦ тунемме ўзгар-влак;
♦ книга-влак;
♦ баскетбол мече;
♦ 100 чупа-чупс.

Тўн приз - ПЛАНШЕТ!





Поэт лүмеш

У Торъял посёлкысо рүдө книгагу-дышто «Мемнан илыш – тура йолгорно» лүман Данилов лудмаш нылымше гана эртаралте. Чобыксола ялеш шочын-кушшо поэт Борис Григорьевич Даниловын почеламутшо-влакым коло утла тунемше сылнын лудо.

1-ше верым налше-влак:

Марий йылмым кугыжаньш йылме семын тунемше-влак кокла гыч:

4-7-ше классла – **Карина Воронцова** (У Торъял школ-интернат, 7-ше кл.),

8-11 классла – **Алиса Ермакова** (У Торъял шк., 11-ше «Б» кл.). Снимкыште - шке школжо гыч Валерия Егочина (6-шо «А» кл.) да Сергей Юркин (10-шо «Б» кл.) дене пырля. Нунат призовой верыш лектыныт.

Марий йылмым шочмо йылме семын тунемше-влак конкурслан ала кӱлеш семын ямдылалтын огытыл, ала чот тургыжланеныт, но 8-11-ше классла коклаште 1-ше верым налше ыш лий, а 4-7-ше классла гыч **Анна Богатырёва** (Токтарсола шк., 6-шо кл.) ойыртемалте.

Почеламутым рушла лудшо-влак шагалын ылыгыч, сандене жюри ийготым ончен огыл, 1-ше верым икой дене **Кирилл Кореповлан** (У Торъял школ-интернат, 4-ше кл.) пуыш.

Чыла конкурсантлан да туныктышо-влаклан тауштена. Почеламутым лудмаш авторын чон поянлыкше дене палымым ышта да участникымат сылнымутым умылаш туныкта.

Анфиса ЭМАНОВА, жюри енге.

Кугешнена

Кандашыме классышты-на кум эрге да кум ўдыр тунемына. Класс вуйлатышына Наталья Николаевна Ильина руш йылмым да литературы туныкта. Пеш поро, мыланна эре полшаш ямде. Пырля тунемше Ольга Будённая дене кугешнена.

Тудо чыла «визытанлан» тунемеш. Тений англичан йылме дене районьысо олимпиадыште 1-ше верым налын.

Юлианна ЕРМОЛАЕВА.
Марий Турек,
Сардаял.



Алёна акам Шернурышто ила, «Висвис» йочадыште пашам ышта. Мый тудеке уналыкеш куанен коштам. Ик кечын йочадыштышт «Шыже ярминга» эрген. Ача-авашт дене пырля йоча-шамыч тӱрлӧ поделкым ыштен кондыт.

Наташа СЕРГЕЕВА.
Морко, Шордӱр.

Историйым шергалына

3 декабрь -

Палыдыме салтакын кечыже.

5 декабрь - Российыште Воинский чап кече. 1941 ийыште ты кечын Йошкар Армий Москва воктене кредалмаште фашист тӱшкам чактарен, контрнеступленийым тӱналын. Совет Ушемьын рӱдолаже верч куд тылзе утла пеш неле да вяйн кредалмаш каен. Фронт кок тӱжем наре менгыш шуйнен. Тушто 2,8 миллион утла салтак кредалын. Бойышто 2 тӱжем наре танк, 21 тӱжем орудий да миномёт, 1,6 тӱжем утла самолёт лийыныт.

9 декабрь - Ачамланде герой-влакын кечышт. Тиде пайремын историйже XVIII курымышто тӱналын. 1769 ийыште Екатерина II кугыжа Святой Георгий Победоносец орденым учредитлен. Кредалмаште геройлыкым ончыктышо воин-влак ты орден дене палемдалтыныт.


Куаным пӱлеклен

Теле толын, теле толын!
Лум лумеш эрат-касат.
Йоча-влакше кажне кечын
Мунчалташ пешак вашкат.
Налыт пеленышт издерым,
Куржыт нуно ўчашен.
Йӱратат ньога-влак телым.
Лум куаным пӱлеклен!

Надя ВАСИЛЬЕВА.
Советский, Вечын.

«Йоча шочмо йылмыжым палышаш», – ойла Татарстан Республикысе образований да науко министр Э.Н.Фаттахов

23 - 24
ноябрьште
Марий Элыште
Татар просвеще-
ний кече-влак
эртеныт.



Татарстан Республикысе премьер-министрын алмаштышыже, образований да науко министр Э.Н.Фаттахов ден Марий Эл Республикысе образований да науко министр Г.Н.Швецова вашкылым пенгыдемдыме шотышто ойпидышым подписатленыт.

Энгель Навапович Марий Элыште татар йылмым арален кодымашке кугу надырым пыштыше икмыняр еҥлан Татарстан Республикын кугыжаныш наградыже-влакым кучыктен. Татар йылме дене савыкталтше учебниклам налаш республикылан сертификатым пуэн.

Э.Н.Фаттахов журналист-влак дене вашлийын мутланен.

– «Образований системым модернизи-
роватлыме» программе почеш
Татарстаныште могай паша ышталтеш?

– Программе почеш 162 йочасадым
чоҥымо. Тыге кумло тўжем утла икшывы-
лан верым ыштыме. Тений Набережные
Челны олаште 1224 веран школым почмо.

Республикын Президентшын полшымыж дене 2016 ийыште лу тўжем утла эн сай педагоглан ноутбукым кучыктымо. Пытаргыш кок ийыште 148 автобусым районласе школлашке колтымо. 2012 ий гыч 780 школым да 63 йочасадым олмыктымо.

– Республикыштыда татар йылмым туныктымо йодышлан могайрак тўткылык ойыралтеш?

– Кажне икшыве шочмо йылмыжым палышаш. Ок пале гын, тунемшаш. Татарстанысе чыла школлаште тунемме программыш татар йылме урокым пуртымо. Шочмо йылмым тунемаш да шинчыма-шым нўлташ полшышо лагерь идалык мучко пашам ышта. Тений ты лагерьыште Российын 33 регионжо да кум йотэл гыч икшыве-влак лийыныт. Российын 26 регионыштыжо татар йылмым тунемыт. «Ана теле» татар онлайн-школ уло. Кызыт марте лу тўжем наре еҥ туддене пайдаланен. Икшыве-влак татар йылме дене шинчымашыштым олимпиадыште тергат. Ончыкыжым тудым тўнямбал кўкшытаным ышташ шонена. Талантан йоча-влакын сылнымутан творчествоштылан кугу тўткылык ойыралтеш. Туныктышо-влаклан «Татар теле» журнал савыкталтеш. Тудын электрон вариантше дене педагог-влак яра пайдаланат.

– Татарстан Республикыште мыняр школышто марий йылмым тунемыт?

– Марий йылмым шочмо да кугыжаныш йылме семын 20 школышто да 11 йочасадыште тунемыт. Марий йылме, литература, ИКН дене учебниклам эре ситараш да жапыштыже налаш тыршена.

Л.ГРИГОРЬЕВА.

Серыш

Чон почмаш

*Салам лийже, йўратыме
туныктышем Лидия Аркадьевна! Мый
тыланда чон почын серышым возем. Те
школышто шуко ий ыштеда. Шарнем,кузе
мый икымше классыш изи йоча толынам.
Те ручкам чын кучаш,чаткан возаш,шот-
лаш, лудаш туныктышда. Классыште
ваш-ваш келшен илаш, икте-весылан эре
полшаш темледа. Тендан туныктымо уче-
никда-влак чылан сай айдеме лийыныт.
Ида коляне, меат кумылдам огына волто.
Тендам нигунам огына мондо.*

Павел ГАВРИЛОВ,

3-шо классыште тунемшыда.
Провой кундем, Поянсола.




Л.А.Васильева - тунемше-влак коклаште.



Еш – пиалын эңертышыже.

Кочанам шарнена

Кочам Василий Александрович Милютин 1941 ий теле тылзын коло нылымше кечынже Куженер район Рушпылак ялыште шочын. Йоча жапше пеш неле улмаш: кочкышат, чияш вургемат лийын огыл. Ачаже сарыш каен да пörтылын огыл. Аваже шужен колен. Шым икшыве гыч ныл рвезе веле илен кодын. Метрий изаж дене күчен коштыныт. Ушквал ден комбым күтымыжлан изиш киндым пуэныт. Кочам лу ий утла армийыште служитлен. Вара «Маяк» совхозышто пашам ыштен, Шорсола ялсоветым вуйлатен. Ковам ден коктын кок йочам ончен куштеныт. Ме кочанам эре шарнена.



Анна АЛЕКСАНДРОВА.

Куженер, Уштымбал.

Марий йылмым палыман

Марий йылме урокышто «Мыйын ешем» темым лончылышна. Ешыште нылытын улына. Ачам Валерий Иванович М.Шкетан лүмеш Марий национальный драме театрыште пашам ышта. Авам Антонида Анатольевна «Хрусталик» оптикыште тырша. Катерина шүжарем 2-шо классыште тунемеш. Мыйын шонымаште, кажне марий йоча марий йылмым палынаш.



Мый марла мутланаш Шенше ялыште тунемынам. Тушто кочам, чүчүэм, кокам илат. Юля шүжарем ден Аксар шольым йоча-садышке коштыт. Нуно марла сайын кутырат.

Аня АНДРЕЕВА, 7-ше «М» класс. Йошкар-Ола, 11-ше номеран лицей.


Илаш туныкта

Мыланем авам – эн шерге айдеме. Тудо мотор, ласка да поро. Кочкаш пеш тамлын шолта. Яра жапыште пушкыдо меж носким пидеш. Кастене мөнгысö пашам терга, мый денем ончыкылык илыш нерген кутыра. Авай деч посна мыланем йокрок. Мый тудым чот йоратем.

Вадим ПАНАЕВ, 6-шо класс. Советский, Вечын.

Кидмастар

Авам – поро да сай озавате. Кызыт изи шүжарем дене мөнгыштö шинча. Яра жапше годым носким пидеш, түрлашат пеш мастер. Мыйымат кидпашалан туныкта.



Ольга ЯДЫКОВА, 6-шо класс. Шернур, Марисола.

Теле лүдыкшö огыл

Ешна шуко вольыкым онча. Кенежым шудым удыраш, күтүм күташ, пакчаште шүкшудым күраш, вүдым шаваш пернен. Авам ойла: «Кенежым пүжалт пашам ыштет гын, телым ласкан илет». Кызыт пörтйымал тич паренте, түрлö варене, компот, шинчалтыме пакчасаска уло. Шкенаш шöрым, шылым кочкына. Садлан теле лүдыкшö огыл.



Эдита АЛЕКСАНДРОВА. Морко, Арын.

Ешем

Мыйын ешем – тиде авам да ковам. Авам Ангелина Анатольевна – йочасадыште воспитательнице. Тудлан чыла шонымашем ушанен ойлем. Ковам Нина Семёновна пеш тамлын кочкаш шолта. Кызыт тудо – сулен налме канышыште. Авам ден ковамым чот йоратем. Мыйын эше чүчүэм ден кокам улыт. Ме, пырля погынен, пайремым эртарена, пашам ыштена, веселан канена.

Арина БЕЛЯЕВА, 4-ше класс. Национальный президент школ-интернат.





Тунемаш каена

*Тунемме кече толын шу,
Кажныже ике классыым муо.
Парт коклашке шинчына,
Шинчымашым налына.
Теве шергылте звонок.
Тўнале вучымо урок.
Учитель ум каласкала,
Чылан ушнам келгемдена.*

Юрий ЧЕРВЯКОВ,
6-шо класс.

*Идым тылзе толын шу,
Чылан школыш погынат.
Сумка-влакым
тич темалын,
Поче-поче ошкедат.
Тольык школыш*

*ок шу кай(ы)ме,
Чотак малыме шукта.
Школыш миен пурымеке,
Чыла омына пьта!*

Анита ГАЙНУТДИНОВА,
5-ше класс.

**Пошкырт кундем,
Мишкан, Марий нацио-
нальный гимназий.**

Байрамов, Вячеслав Янгубаев серен колтеныт.
Молодец улыда. Ончыкыжымат возыза. Вучена.



Кидпашалан мастар

Авамын лўмжō – Альгина. Тудо икмарда капан, шышталге ўпан, шем шинчан. Школ деч вара кевытчылан тунем лектын да кызытат ойырен налме профессионал дене селасе «Настенька» кевытыште тырша. Авам пеш тамле кочкышым шолта, кидпашалан мастар. Тудо мыланем олимпиадылан, экзаменлан ямдылалташ полша, юггунам мōнгысō пашам пырля ыштена. Мый авамым пеш йōратем.

Андрей АКСЯКОВ.
Пошкырт, Дōртыльō,
Чарлак.

3-шо клас-
сыште тунемше
Ариадна Масаева
- аваже Альбина
Михайловна
дене пырля.



Школышто

Мемнам Антонина Семеновна Панкова туныкта. Тудо икымше класс гыч шинчымашым пуа, койыш-шоктышнам тапта. Уроклаште мом гына ок ыштыкте: шотлена, предложенийым лончылена, почеламутым лудына. Сай ден осалым ойырен мошташ, неле-йōсым чыташ туныкта. Тудлан кугу таум каласем.

Вова САЙТЕЕВ, 4-ше класс.

* * *

Математике урокым эн чот йōратем. Ирина Геннадьевна Захарован мутшым тўткын колыштам, кажне уроклан тыршен ямдылалтам. Урокушто тўрлō примерым ыштена, модына, шуко ум пален налына. Туныктышына поро кумылан, шыма. Мемнам икте-весым пагален илаш туныкта.

Тимур ДМИТРИЕВ, 6-шо класс.

Одо кундем, Алнаш район, Одо школ.



Эр юж дене, у вий дене
Мый гимназийыш вашкем.
Шинчымаш тўнян омажым
Вашкерак кумдан почнем!

Виктория МИКАЕВА,
5-ше класс.

Редакций деч. У тунемме ий тўналме нерген почеламут-влакым тыгак 6-шо классыште тунемше-влак Виктория Янгубаева, Юлия Зайнитдинова, 5-ше классыште тунемше-влак Богдан Васильев, Настя Аблеева, Дима Зайнакаев, Иван Петров, Марианна Шайбакова, Костя Байрамов, Вячеслав Янгубаев серен колтеныт. Молодец улыда. Ончыкыжымат возыза. Вучена.



Г.Микайын «Рывыж»
басныжлан Татарстан
кундем Алабога район
Кўплык школ гыч Кирилл
ФИЛИППОВ сўретлен.

Йошкар-Ола

Йошкар-Олаште лийынам,
Тидлан пеш чот йывыртенам.
Йошкар-Ола – пеш сай ола,
«Йошкарге» мутшымак сула.

Олаш пурет да тый ужат,
Кузе вашталтын чылажат:
Вўдшат, пōртшат да уремжат,
Театр, кремль, молыжат...

Ола покшеч энер йога,
Олам эше чот сылнешта.
Бульвар энер деч суйналтеш,
Чавайнын лўмжым нумалеш.

Мийыза теат Йошкар-Олаш,
Шке шинча денак ужаш.
Ола пеш порын вашлиеш,
Шарнымашеш эре кодеш.

Катя ПАЖБЕКОВА.
Татарстан, Агрыз, Буймо.

Серыш

Авам – мыланем эн лишыл айдеме. Тудо поро, шыма. Южгунам уремшыште шукырак модам. Тунам мӱнгылан пуымо урокым ышташ жап шагал коdech але йӱршынат огеш код. Тугай годым авай шыдешка. А мый палем вет, тудо мыйым йӱрата, сайым веле мыланем шона. Авай! Чӱчкыдынрак шыр-гыжал, ит шорт, ит ойгане нигунам! Мый вет палем, кузе неле тыланет шкетланет мемнам ончен кушташ. Кугу лиям, мый тыйым ом кудалте, йӱратыме аваем! Тыгаяк лишыл кодат.

Мыняр йӱд омывм коден, авалан мемнан верч тыршашыже логалеш. Таза лий, нигунам ит шорт, авай! Ме тыйым чот-чот йӱратена. Ачам Морко районышто ила. Южгунам мемнан дек Сотнурыш толын кая. Умаште У ий ёлкыш толмыжлан чот куаненем ыле!

Никита СОКОЛОВ, 3-шо класс.

ӱдырлан пеш кӱлеш. Южгунам Ксюшан коваже пеленже шинча.

Никита 4-ше классыш коштеш. Физкультурым, трудым йӱрата. Граф пийже – эн ӱшанле йолташыже.

– Ик кечын Ксюша йочасад гыч толын да пеш куанен ойла: «Ме таче куштышна. Мыйым воспитатель Светлана Васильевна мокталтыш». А мыйже нунылан ойлем: «Тендан нерген сайым ойлат гын, мыланемжат вет сай чучеш. Чыла вере тыршаш кӱлеш», – ойла ава. – Яна ӱдырем черлак шочын.

Нигунам ит шорт, авай!

Редакцийшыкына тыгай серыш толмо деч вара Никита да аваже дене палыме лияш мийышна. Нуно Волжский район Сотнур селаште илат. Аваже – Татьяна Витальевна Никитина. Рвезе чынымак воза, аважем пеш чамана. «Ик кечын кудывечыш лектын да ала-мом пӱчкеда, чӱгыт дене перкала, – каласкала аваже. – «Мый вет кугу лиям да тылат чыла ышташ полшем» манеш».

Индеш ияш Никита ешыште кызытеш изи сурт-озалан шотлалтеш. Яна аваже да Ксюша шӱжарже улыт.

Яналан кызыт – 13 ий. Тудо черле: коштын ок керт. Шукыжым вакшышыште кия, а кунам ала-мозо коршта, шорташ тӱналеш. Ава тудым кидыш налеш да аза гай рӱпшен шинча. Кок-кум шагат, южгунамже йӱдвоштат, малаш вочде, тыге шинчаш перна.

– Южо ет мыйым вурса, эмлымверыш намиен кодаш темла. Кузе мый тудым кудалтем? Вет шкемын

ӱдырем. Кеч-могай лийже – пеленемак илыже, – ойла ава.

Яна шолыж дене модаш пеш йӱрата. Никита иктаж-могай пушкыдо модышым кучыкта, а Яна кӱвар ӱмбаке кудалта. Никита адак нӱлтат пуа. Аваже мӱнгыштӱ уке годым Яналан совла дене йогуртым пукша.

Ксюша 5 ийым темен. Тудо йочасадыш коштеш. Сӱретлаш пеш йӱрата. Пеледышым, кечым, пӱртым тетрадь лаштыклаш сӱретла. Пырдыжеш сакыме ачажын портретше тураште шогышо ӱстембак нуным конден опта. «Тек ачамат ужеш», – манеш. Ачаже Евгений Николаевич ныл ий ончыч ош тӱня гыч каен. Сандене Ксюша моткоч йокроклана.

Ачаже улмыж годым ешыште пеш весела лийын. Янат куанен юарлен. А кызыт аваже Волжск олашке шумеш эмлан кудалеш – Яна шкетын коdech. А эм



Изиракше годым эре эмленна, массажым ыштенна. Ик-кок ошкылымат ышта ыле, но приступ чӱчкыдынрак да чӱчкыдынрак лияш тӱнӱалмек, врач чарыш. Кызыт эмывак веле йӱына.

Самырык ӱдырамаш нелылыкыш логалын гынат, илышлан куанымым ок чарне. Кум шочшыжо – пеленже. Кажне кечын Юмо деч пиалым, йочаже-влак-клан тазалыкым, Янан орлыкшым куштылемдаш, ӱмыржым кужемдаш сӱрвален йодеш.

Вашке У ий толеш. Тек Йӱштӱ Кугыза юзо тояж дене пералта да Никитамытын сурт гыч шинча-вӱдым торах нангая.

Л.СЕМЕНОВА.



Кидым лывыртена

«Пиалан» да «пиалды-ме» лүм-влак улмо нерген ожнысек ойлат. Рвезе лүм-влак коклагыч Александр эн пиаланлан шотлалтеш. Нуно лүддымё, ушан, изинекак лидер койышан да сеньше улыт. Иван, Олег, Николай, Михаил, Елена, Наталья, Татьяна пиалан лүм-влак радамышке пурат.

В.СМИРНОВ ямдылен.

Ме, воспитатель-влак, «Ямде лий» газетсые изи почелатна, йомакым лудына, туштым туштена. Йоча-влак чиялташ темлыме сүрет-влакым үчашен чиялтат (снимкыште).

Тыге нунын кидышт лывырга, вес гана йытыран возаш тўналыт.

Р.В.КОРОТКОВА.

Волжский, Пётъял.



Модыш

Изирак класслаште тунемше-влак «Кладым кычал» модыш дене модыныт. Кок командылан вич станций гоч эрташ кўлын. Кажныже мастер да писе улмыжым ончыктен. Кладым 3-шо классын командыже эн ончыч муын.

Анатолий АЛЕКСАНДРОВ.
Морко, Шўргыял.



Йошкар-Оласе 32-шо номеран йочасадыште шыжым ужатыме пайремым эртареныт. «Вишенка» группо шыже ярмингам ончыктен. Артём Петров (снимкыште) кочан рольжым модын.

Н.ГОДУНОВАН фотожо.

Йомак

Шыжылан Шўдымарий ял пеш келшен, сандене тушеч каяш огешат вашке. Ик кечын тудо Теле дене вашлие.

– Ну, Шыже, тыйын жапет эртыш, – мане Теле. – Ынде тиде кундемым мый сорастараш тўналам.

Шыже Телым ондалаш шонен пыштыш.

– Ох-ко-ко! Мый эше чыла пашам пыта-рен шым шукто. Пу мылам эше ик тылзым, вара вашталтына.

Теле пеш поро лийын, тыге вашештыш:

– Йора, Шыже. Мый тылат тынар жапым пуэм. Тыгодым пўртўслан у вургемым ямдылем.

Шыже Телым ондален кертмыжлан пеш куаныш. Тыге-туге тылзат эртыш. Теле Шўдымарий



ялыш пўртыльё.

– Ну, Шыже, чыла пашатым ыштен шуктышыч?

– Уке, – шинчавўдым лукто Шыже. – Жапем ыш сите, эше ик тылзым пу!

Теле Шыжын чоялыкшым умылыш да пентгыдын каласыш:

– Уке! Йоча-шамыч ынде мыйым вучат, нуно ече дене мунчалтынешт.

Кок пагыт коклаште кугу үчашымаш тўнале. Тудо икмынар кече шуйныш.

Уремыште я йўр йўреш, я лум йога, я кылмыктен шында, я шулыкта.

Вара Шыже шке йонгылышыжым умылыш: эре Шыже лийын огеш керт. Тыге Шўдымарийыш Теле пурыш.

Екатерина ЕГОШИНА.

Куженер район.

Индекс: Марий Элыште - 78574, вес кундемлаште - 52713. Тираж 1150 экз. Заказ 2989. Формат – А-4-8. Директор-тўн редактор **Л.В.СЕМЕНОВА.**

E-mail: yamde_lii@mari-el.ru, yamde_lii@mail.ru. Сайтын адресше: yamde-lii.ru, Тел. 45-25-49(факс); 45-22-82.

УЧРЕДИТЕЛЬ-ВЛАК:
Марий Эл Республиксые культур, печать да национальность паша шотышто министерстве, "Ямде лий" газет" кугужаныш унитарный казенный предприятий.

Газетым Массовый коммуникаций сферыште да культур наследийым аралымаште законодательством шуктен шогымым эскерыше Федеральный службн Приволжский федеральный округысyo управленийыштыже регистрироватлыме. Номер – ПИ №ФС 18-1999, 2005 ий 10 февральыште пуымо.

0+

Печатыш пуымо жап – 14-00, фактически – 13-00. Ак – кутырен келшыме почеш.

Авторын да редакциянын шонмашыш тўрлў лийын кертыт. Серыш-влак мўнгеш огыт коллат.

Газетым редакцияштыге погымо да верстатлыме, «СТРИНГ» ИПФ ООО-што ямде оригинал-макет гыч савыктыме. Типографиянын адресше: 424006, Йошкар-Ола, Строитель урем, 95.

Редакциянын да издателын адресше: 424006, Йошкар-Ола, СССР Вооружённый Вийын 70-ше идалыкше урем, 20.

